

ਧਿਯੁ ਸਾ: ਜਿਯੁ ਸਾ: ਭਗੀਯੁ ਸਾ: - ਮੁਨਾ ਸਾ:

# ਮੁਨਾਸਾ ਵੰਬਨਿੰ



## ਲੁਮਨਿ ਪੀ

**Munasa: Souvenir-2023**

ਨੈ.ਸੰ. ੧੧੪੩ (ਵਿ.ਸੰ. ੨੦੮੦)



केशरमान ताम्राकार  
सिकागो

## मुनासःया ख्यालः कासाय् जिं नं सिरपाः कया

दकलय् न्हापां मुनासःया ५० दै क्यंगु लुँबुदिंया लसताय् भिंतुना व लसहना ।

जितः लुमं कथं मुना सःया पलिस्था नेपाल सम्बत १०९२ गुंलाथ्व १४ खुन्हु भाजु नबिन चित्रकारया संस्थापकत्वय् फसिकेब त्वाल्य् भाजु हरि तण्डुकारया छैस जूगु खः । थुगु संस्था स्वसांनिसें थीथी नेपालभाषाया ज्याइवःलिसें मूज्या धैगु ख्यालःकासा न्ह्याकेगु ज्या यानावन । आतक्कया दुने खुकः तक ख्यालः कासा यानाः दिनाच्चंगु लोकंहवाःगु संस्था मुनासः हानं दनावःगु दु । न्ह्यगु ज्यासना पुचलं ख्यालः कासा यानाः दैय्दैय् पतिकं ख्यालः कासा याना यंकी धयागु जिगु पाखें विश्वास दु ।

नेपाल सम्बत १०९३ निसें ११०० तकया दुने मुनासःपाखें खुकः ख्यालः कासा याःगु जुल । न्हाप लाःगु ख्यालः बांलाःम्ह ख्यालः च्वमि, निर्देशक, ख्यालःम्वःतयूगु पाखे मिखा तयेगु खःसा अप्वः धै थे सिरपात रामशेखर, पद्मरत्न तुलाधर व श्री कृष्ण ‘अणु’पिसं काःगु दु । मुक्कं स्वकः तक ख्यालः कथं न्हाप सिरपाः (१०९३, १०९५ व १०९७) या सिल्ड यंकाद्यूम्ह श्री कृष्ण ‘अणु’ खः । अले निकः (१०९४ व ११००) रामशेखरं यंकल सा छकः (१०९६)य् पद्मरत्न तुलाधरया ख्यालकं यंकल ! थथे धायेबले - प्रतिशत कथं

श्री कृष्ण ‘अणु’	रामशेखर	पद्मरत्न तुलाधर
५०.०१%	३३.३२%	१६.६६%

थुकथं स्वयेबलय् उगु ईया व आतकंया नं नेपालभाषाया ख्यालः ख्यलय् वय्कःपिं हे खः - ख्यालः च्वमि जुजुपिं।

बांलाःम्ह ख्यालः च्वमिकथं न्ह्यब्वयेगु खःसा सुं नं च्वमिं निकः बांलाःम्ह ख्यालः च्वमि जुझ्मफुत ।



बांला:म्ह ख्याल: च्वमि कथं १०९३ य 'खिचा त्वापु' च्वमि खने मदु, १०९४ य 'खान्दानि फ्वींग' च्वमि अमृत रत्न तुलाधर, १०९५ य 'तं बैक', श्री कृष्ण 'अणु', १०९६ य 'वा वल फय वल' पद्मरत्न तुलाधर, १०९७ य 'बान्हा: ख्या:' केशरमान ताम्राकार, व ११०० य 'खुँ', रामशेखर जूगु जुल। अथे हे ख्याल: निर्देशक कथं स्वयेगु ख:सा १०९३य श्री कृष्ण 'अणु', 'तांतिग्व:जा', १०९४ य हानं श्रीकृष्ण 'अणु' खान्दानी फ्वींग, १०९५ य खने मदु, सायद स्वयातं मव्यूगु जुइफु, १०९६ य भृगुराम श्रेष्ठ, 'वा वल फय वल', १०९७ य मोहन लाल 'पांसु', आ: छु यायेगु व ११०० य गणेश सायूमि (सना:गुथि) पिसं सिरपा: त्याक्यू जुल। बांला:म्ह अभिनयपाखे नं निक: तक सुनां नं का:गु खने मदु। केशव ख्वाउँजु 'जि पट्ठा'

१०९३ य अनार बज्राचार्य 'सीम्हसिया जिलाज', १०९४ य १०९५ सुयात बिल सी मदु। आर. के. निर्मल वा वल फय वल १०९६ य, श्री कृष्ण 'अणु', 'ख:ला मखुला' १०९७ य व कृष्ण नापित 'लाटा' ११००य बांलापिं ख्याल:म्ह: जुइत ता:लात।

मुनास:या ग्वसालय जूगु मुक्कं खुगू ख्याल: कासाय दक्वं याना: ८२ गू ख्यालकं ब्वति का:गु खत। अले थुगु ८२ गू ख्याल: न्ह्यब्वयेगुया लागी ४२ गू खलकं ब्वति काल।

पीनिगु खल: मध्ये छगू खल: ख:- ल्हुतिया तिमिला खल:। तिमिला खलकं ब्वति का:गु ख्याल: ख:- 'बान्हा:ख्या:'। थुगु ख्याल: ने.सं. १०९७ य जुगु ख्याल कासाय ब्वति कया: ख्यालकं न्हाप लिउ व बांला:म्ह ख्याल:च्वमि कथं केशरमान



ताम्राकारं (जि) सिरपा: त्याकूग जुल ।

थुगु ख्याल: रिहसल जुयाच्चंगु इलय्या छत्वा:चा बाखं - प्यम्ह ख्याल:म्व:त, मध्ये छम्ह सशक्तम्ह ख्याल:म्व: रमेश काजी स्थापित (वय्क:या च्वसु शिकागो नेवा:सं प्रकाशित जूगुपाखें) थुकथं थ:गु अनुभव न्ह्यब्वया दी ।

"..... ने.स. १०९७ पाखेया खँ ख: । छन्हु केशरमान सुथसिया न्याता: इलय् जिगु मखनय् च्वंगु छैय् वल । जि घना हे च्वनातिनि । व उइलय् अथे व:गु खना: जि अजू चाल । लिपा खँ ल्हाल्हां सिइदत - उगु दैय् मुनास:पाखें ग्वसा: ग्वइगु न्याक्व:गु ख्याल: कासाय् 'तिमिला खल:' ल्हुति पाखें नं ब्वति का:गु जुयाच्चन । ख्याल:या च्वमि केशरमान हे । प्यम्ह पात्र दु ख्यालकय् दकलय् ता:हाक:गु भूमिका म्हितादीम्ह ख्याल:म्वलं हे ख्याल: म्हितेगु त्व:ता बिउगुलिं उगु ख्याल: क्यने मफइगु अवस्था वल । थ्व खँ ग्वसा: खल:यात धा: वंवल्य् मुनास:या दुज:पिसं थ्व ख्याल: न्ह्याथे याना: सां क्यने हे मा: बरु जिमिसं छुं ग्वाहालि याये मा:सा धा धका: धया ह:गु जुयाच्चन । अथे जुया: वं उगु भूमिकाय् म्हिता बीत जित: धा:व:गु जुयाच्चन । जि वयात धया - जि थें ज्याम्हस्यां नं, ख्याल: म्हिता: नइ ला । जि थ: कलाकार जुइ धका: गबलें कल्पना तकं यानागु मदु ।

'आम खँ मेपिसं धा:गु सा खइ । छं धाये मल्व: छं याये धाल धा:सा पक्का नं याये फइ धयागु विश्वास ज्वना: हे जि छंथाय् वयागु ख: । केशरमानं थथे धा:बलय् जिं वयात छुं धाये मफुत । वं तसकं कर कर यासैलि जि उगु ख्याल: म्हितेत तयार जुया ।

वास्तवय् केशरमानया ह:पा: कया: यानागु थ्व छगू जिगु दुस्साहस ख: । छाय्धा:सा उबलय् जि सेखं चाया: क्वछुइ तकं मजिउ, न्हासं तिकितिकि वइगु । अज्या:बलय् नं महाबूया छकू ख्वाउँ छेरिइ लाक्क प्यन्हु व नं निर्देशक हे मदयेक कलाकारत थ:थ:पिसं हे स्वया: न्हिछि न्हिछि रिहसल याना: उगु ख्याल: क्यंवेनेगु आँट यायेगु धयागु ला दुस्साहस

हे ख: मखुला ? (लिपा श्री कृष्ण 'अणु' पाखे फाइनल टच याना बियादिल) तर जिमिगु मेहनत सिर्तिं मवन । मुनास:या उगु न्याक्व:गु नेपालभाषा ख्याल: कासाय् केशरमानं च्व:गु उगु 'बाऱ्हा:ख्या:' नांगु ख्याल: न्हापलिउ सिरपा त्याकेत ता: लातसा केशरमान दकलय् बांला:म्ह ख्याल: च्वमि घोषित जुल ।

थ्वयां लिपानिसें साहित्य ख्यलय जक सक्रिय जुयाच्चनाम्ह जि बुलुहुं बुलुहुं कलाकारिता ख्यलय नं ला: वन । .....

थुकथं कलाकारिता ख्यलय थौ जिगु गुगु थासय् थ्यंगु ख:, अनतक थ्यंकेत पासा केशरमानया ह:पा:या त:धंगु ल्हा:, दु वं सातुसाला: घ्वातु घ्वाना: थ्व ख्यलय् ब्वना मह:गु ख:सा नेपालभाषाया कलाकारिता ख्यलय जिगु गुगु नां दुगु ख: व दइगु खइ मखु !

रमेश काजी स्थापितया न्हापांगु अभिनय प्रस्तुत जूगु दबू मुनास: ख: । अले थुगु ख्याल: दबुलिइ प्रस्तुत यायेगु ह्व:ता: बियादीपिं नं, मुनास:या दुज:पिं ख: । वय्क:पिसं बचं बिया दी थें, ह:पा: बिया दी थें छु माल जिमिसं ग्वाहाली याये, छिकपिसं थ्व ख्याल: क्यना दी हे मा: । अथे धयागु ख्याल: दबुली क्यने न्ह्य: मुनास:या दुज: दथुइ दुने रिहसल क्यनेमा: । अले जक पास फेल याना: जक दबुली प्रतियोगिताय् ब्वति कायेत उजं बी । जिपिं रिहसल क्यनेत लायक मजूनि वय्क:पिसं ब्यूगु दिं खुनु । वहे खँ वय्क:पिंत धया । अले वय्क:पिसं व खुन्हु छिकपिं प्यम्ह भासँ, मा:गु बिचा: याये । जिपिं ख्याल:म्व:त रमेशकाजी स्थापित, केशरमान ताम्राकार, रवि प्रसाद श्रेष्ठ व नारायण कृष्ण श्रेष्ठ प्यम्ह वना, वृतान्त खँ कना । जिमिगु खँ न्यना: वय्क:पिसं छिकपिनिगु ख्याल: पास जुल, छिकपिं धुक्क जुया: दबुली भासँ धया दिल । सायद रिहसल मक्यँसे पास जूगु ख्याल: जिमिगु हे जक जुइमा: । थ्व जुल - मुनास: व जिमि दथुया दुखँ !